


Show final di obranan teatral “Paden pafo” na Atelier 89’



ORANJESTAD – Recientemente tuma luga e final di e tayer di teatro na Atelier 89’. Cu 8 diferente presentacion, e anochi titula “Paden pafo” tabata un sorpresa pa hopi di esunnan presente. Bon Dia Aruba a presencia e anochi aki, pa capta e espec-

taculo.

E anochi a cuminsa ora cu Albert Schoobaar ken tabata e meneer cu a duna e tayer, a parti e audiencia den grupo y tur a haya un lider. Asina e gruponan di hende a cuminsa cana bay na e obra teatral nan cu tabata mara na un

cierto tempo. Ora e tempo pa cada obra teatral tabata pasa, un pito tabata zona, e grupo mester sigui pa e siguiente. E anochi sin duda tabata algo diferente.

Tambe den e transcurso di e cambio, musica masha misterioso tabata zona.



E obranan

Tur e obranan tabata tin un tema diferente, hopi di nan tabata monologo pues un hende so actuando. Entre e obranan tabata tin un basa riba un hues cu tabata husga tur hende y na final ta sentencia su mes na un bida liber di husga tur hende. E obra aki tabata inclui pidanan tanto comedia como drama y un poema recita pa e dos participantenan. Tambe a presenta e obra di

un mucha muhe cu tabata severamente depresivo, pa casi 5 minuut e la drumi riba un corchon sin haci nada. Y aunke e publico a cuminsa bira desespera, e la captura locual hopi hoben ta pasa awendia. E tabata tira riba un corchon ta wak su culpa y wak e curpanan di revista. E tabata lanta solamente pa wak su telefon y su laptop, sin papia cu ningun hende.

Un monologo hopi peculiar tabata esun di un señora, cu a involucra e audiencia completo.

E tabata tin hopi mascara colga riba un waya y segun e, tur tabata representa un persona. Ora e publico tabata kies un cara, e tabata nara un storia. E tabata hopi obvio cu e personanan tabata den un centro medico. Ora Bon Dia Aruba a puntra e participante kico a inspira e storia aki, el a conta cu e tabata boluntario na un centro pa Alzheimer

na Aruba. Segun e, esaki ta un problema cu di berdad ta existi den comunidad y e ta afectando hopi hende. E mes nunca a kere cu esaki tabata asina grave, e ta conta cu pa un di e testnan hendenan mester a pone e 12,3,6 y 9 den e orden corecto di un holoshi y hende simplemente no tabata sa cual ta e orden di esaki.

Tambe e la comenta cu hopi hende ta cana bay di e centro pa Alzheimer y nan no ta haya nan mas, pa chikito cu e isla ta. Esaki ta pasa di berdad, pa e motibo ey e centro kier a haci un recaudacion di fondo pa por cumpra armbandnan cu GPS pa por haya e hendenan cu scapa.

Otro obranan tabata inclui critica pa sociedad, amor, un muhe cu a bay laga tur cos atras y e storia di un muhe cu a entrega tur cos na su casa y e la bay laga e. □